



partii naleraq

Nuuk, 18. marts 2015

UPA2015/80

Uunga siunnersuut: Umiarsualivimmiinnermut aamma umiarsuarni takornarianik angallassisuni ilaasut akileraarutaat pillugit Inatsisartut inatsisaata allanngortinneqarneranik Inatsisartut inatsisaat nr. xx, xx. xx 2015-imeersoq.

(Umiarsuarni takornarianik angallassisuni ilaasut akileraarutaannik aamma ilaasunik naliginnaasunik takornarianillu angallassinermi ilaasut akileraarutaannik atorunnaarsitsineq)

(Aningaasaqarnermut Aatsitassanullu Naalakkersuisoq)

Siullermeerneqarnera

Ipasaaninguakkunni immikkoortoq 73-i Naalakkersuisunit siunnersuutaasoq maani inersuarmi sammivarput taannalu ima qulequtaqarpoq: Umiarsualiviit pillugit Inatsisartut inatsisissaata Inatsisartunut aalajangiiffiqineqarnera.

Tassani paatsoorneqarsinnaanngitsumik Naalakkersuisuniit ima oqariartuuteqarpusi

(qupperneq 13-mi):

”Qanorluunniit pisoqaraluarpat innuttaasut taamaattumik atuinermut nioqqutissat, sanaartornermut atortussat, maskiinat allallu usit umiarsuarmik assartorneqartussat akiisa qaffangaatsiarnissaat misigisussaavaat.”

Imatut paasillugu, innuttaasoq akitsuiffiqineqangaatsiassaaq – tassami akit qaffangaatsiarnissaat paatsoorneqarsinnaanngitsumik erseqqissaatigivasi.

Ilisimaneqarpoq takornarissat assiginngitsorpassuusinnaasartut aammalu qanoq nunatta iluanaaruteqartarnera, tassanilu aamma inuussutissarsiortut, aamma takornarissat arlaat pineqarnersoq apeqqutaatilluinnarlugu, iluanaarutaasarnerat assigiinngiaartoq. Sukumiisumik misissortariaqanngilaq ilisimassallugu nammattagaqarlutik takornarissat tikittut aammalu takornarissat unnuisarfitsinni unnuisartut neriniartarfitsinnilu nerisartut iluanaarutaasarnerat assigiinngittorujussuusoq. Soorlu aamma ilisimaarigipput umiarsuarmi takornariaq maanga tikittoq, aqqusaartumilluunniit taaginnaraanni ajunnginneruvoq, umiarsuamimi sinittarpoq, najugaqartarpoq aammalu nerisarluni, taamaattumillu umiarsuup iluanaarut annerpaarpaaq isertitsissutigisarlugi,

nunamullu niugaangami ”kaasarfimmiumininnguani” atorniartarai. Taamaattumik aningasamut inatsisissamut uunga sammisamut oqaaseqaatigut innersuussutiginnassuagut.

Isumaqatigiissutigisinnaavarpulli massakkut pisariaqarluinnalersimanera sukarsuit sisamaasat imminut napatilluni inuussutissarsiutinngortinneqarnissaa. Ukiut 30-nngulillartullu aammalu miliartip affaata tungaanut takornariaqarnermut ineriartortitsinermut atoriillarlugillu. Pisariaqarpoq takornariaqarnermi aqqissuusseqqinnissaq aammalu pingaarutilimmik angusaqarfiusumik kiffartuussinissamik isumaqatigiissiusiortalernissaq, minnerunngitsumillu aamma takornariartitsinermi sunarpiaq naleqartillugu tunngavigalugulu sukarsuannortivinnissaa. Isumasioqatigiinnerpassuit naammattut tusareernikuuagut, peqataaffiginikuuagut, oqaaserpassuit kusanangaartut, siunnerfiit kusanangaartut ukiorpassuarni tusartualerpagut – atali timitaliisa, angusaqarta.

Piniartoq, aalisartoq, saniatigooralugu pinialuttartoq aalisartartorlu allagartaqartarpoq ilaatigut akisungaatsiartumik akiliilluni pisiarisartakkaminik, tamakku atugarissaarnerulernissaat pilliutigalugu uku killilimmik iluanaarfiusussat atugassarititaat taamannak oqilisaaffiginiaraanni killormut taava alloriarnerput ingerlaqqinnassooq, nutaamik eqqarsarnissaq qimakkiartoraarlugu.

Tamakku saniatigut siusinaartumik sulisinnaajunnaarnerisutisiallit ikilisaaffiginiarpagut, aalisartut sinerissami umiatsiaararsortut miliuunilikkaanik akileraaruserniarsariniarpagut, ukuali akileerpianngittareersut annertunerusumik nunatsinnut iluaqusiineq ajortut ikilisaaffiginiarlugit – qaa iluamik!

Tamakkuami aamma qaavatigut ilisimaaraarput umiarsuit maanga tikittartut annertooujussuarmik sineriatta imartaanik mingutsitsisuusartut tassuunalu CO2-mik amigartoornitsinnut annertuumik tunngaviusarlutik

Taamaattumik taamatut oqaaserluta una siunnersuut ilalernartissinnaanngilarput, atugarissaarnerulersitsinissamik inuussutissarsiornermilu timitalimmik ineriartortitsinissaq anguniagarigatsigu.

Qujanaq.

Per Rosing-Petersen